

PROBLEMI Pravosuđe u BiH zatrpano

Na sudovima neriješenih 1,9 miliona predmeta

Najveći dio su utuženja zbog neplaćenih računa za komunalije

● Šta je predložio Branko Perić

Od ukupnog broja neriješenih predmeta na sudovima širom BiH, koji je dosegao 1,9 miliona, njih 56 posto odnosi se na komunalne predmete, odnosno utuženja zbog neplaćenih računa za vodu, grijanje, odvoz smeća i drugo, rečeno je na jučerašnjem skupu u Sarajevu koji su povodom tog problema organizirali Visoko sudsko i tužilačko vijeće (VSTV) BiH i Državno ministarstvo pravde uz podršku kanadskog Projekta pravosudne reforme.

Prebacivanje notarima

Na skupu je naglašeno da se od ukupnog broja komunalnih predmeta čak 72 posto nalazi na Općinskom sudu u Sarajevu. Sud je zbog toga formirao dva odjeljenja koja su do sada uspješno riješila oko 50.000 predmeta, ali ni to nije dovoljno, jer kako kaže predsjednik tog suda Goran Salihović, komunalni predmeti zahtijevaju sistemsko rješenje.

- Priliv novih predmeta je ogroman i kada bismo svi zaposleni, nas oko 600, neprestano radili na rješavanju komunalnih slučajeva, trebalo bi nam 38 godina da ih sve riješimo. Problem je i to što svaki predmet kojim se prosječno potražuju dvije marke duga, državu košta 75 maraka - objašnjava Salihović.

On ističe da je jedno od mo-



Sa skupa: Ogroman priliv novih predmeta

(Foto: F. Foča)

gućih rješenja naplata komunalija direktnim odbijanjem od plaća građana, dok u Udruženju poslodavaca komunalne privrede FBiH smatraju da je potrebno novčano stimulirati sudije prema broju riješenih slučajeva.

Milan Tegeltija, predsjednik Osnovnog suda u Banjoj Luci, smatra da nadležnost za naplatu komunalnih potraživanja treba prebaciti na notare, koji bi to radili za novčanu nagradu.

Utvrđivanje strategije

Branko Perić, predsjednik VSTV-a, naglašava da je za rješavanje ovog problema potre-

bno utvrditi strategiju s predstavnicima izvršne i zakonodavne vlasti. To uključuje donošenje nove legislativne, vansudsko rješavanje predmeta...

- Država treba platiti komunalije socijalnim kategorijama stanovništva koje to realno ne mogu izmiriti. Davaoci usluga moraju napraviti analizu i utvrditi ko su stvarni dužnici, koliki je dug, broj zastarjelih dugovanja te građanima omogućiti vansudsko rješavanje, pa čak i oprostiti dio duga - objašnjava Perić.

Na skupu je razmotren akcijski plan za smanjenje broja neriješenih predmeta, a prema riječima Bariše Čolaka, Ministarstvo pravde BiH obavezalo se da će formirati koordinacioni odbor i radnu grupu. Oni će rješavati taj problem kako bi on u iduće dvije godine bio, ako ne potpuno eliminiran, onda barem znatno umanjen.

M. AVDIĆ

Najgori u svijetu

Ted Hil (Hill), direktor kanadskog Projekta pravosudne reforme, ističe da se svaka zemlja u svijetu bori s velikim brojem zaostalih slučajeva, ali da BiH ima specifičan problem.

- Moram priznati da ovoliko predmeta neplaćenih komunalija nisam vidio nigdje u svijetu i zaista mogu reći da je ovaj problem u BiH najgori - kaže Hil.